

ORDENANZA Nº 18:

REGULAMENTO ESPECIAL CONCESIÓN DE
HONRAS E DISTINCIÓNS DO CONCELLO DE
CERVANTES



REGULAMENTO ESPECIAL CONCESIÓN DE HONRAS E DISTINCIÓNS DO CONCELLO DE CERVANTES.

Fundamentación

O artigo 191 do Regulamento de Organización, Funcionamento e Réxime Xurídico das Entidades Locais aprobado por Real Decreto 2568/1986 de 28 de novembro, dispón que os requisitos e trámites necesarios para a concesión dos honras e distincións –a que se refiren os artigos 190 e 189– determinaranse nun Regulamento especial.

En consecuencia toda a materia de honras e distincións outorgables polas entidades locais será regulada a través dun Regulamento especial, non sendo, pois, posible integrar esta materia noutros regulamentos xenéricos.

Artigo 1º.

O presente regulamento ten por obxecto establecer e regular o procedemento para a creación de medallas e condecoracións, coa finalidade de premiar especiais merecementos, beneficios sinalados ou servizos extraordinarios prestados ao Concello de Cervantes e, especialmente, para a adopción e recoñecemento dos “fillos predilectos” e dos “fillos adoptivos” do Concello de Cervantes, atendidos os méritos, cualidades e circunstancias singulares que nos galardoados concurren.

Artigo 2º.

Todas as distincións ás que fai referencia este regulamento teñen carácter exclusivamente honorífico, sen que, polo tanto, outorguen ningún dereito administrativo nin de carácter económico.

Artigo 3º.

Ningún distintivo honorífico nin nomeamento poderá ser outorgado a persoas que desenvolvan altos cargos na Administración e respecto dos cales se atope a corporación en relación de influencia política ou administrativa, función ou servizo, en tanto subsistan estes motivos.

Artigo 4º.

O Concello de Cervantes institúe o título de “**fillo predilecto do Concello de Cervantes**”, coa finalidade de premiar a aquelas persoas naturais do Concello que prestasen servizos extraordinarios relevantes para os intereses xerais do municipio que as fagan merecentes do agradecemento e da gratitude dos cidadáns.



Asemade institúe a honra de “fillo adoptivo do Concello de Cervantes” para agasallar os mesmos méritos e cualidades, cando concurren en persoas que non sexan naturais do Concello Cervantes.

Calquera destes dous títulos sóo poderán concederse cando a “medalla de oro” non se considere suficiente distinción para os merecimentos que concurren na persoa galardonada.

Artigo 5º.

Institúese a condición de **“membro honorario do Concello de Cervantes”**, coa finalidade de premiar a aquelas persoas merecentes dun público recoñecemento, por seren posuidoras de evidentes méritos e cualidades persoais, especialmente profesionais ou empresariais, ou polo desenvolvemento de postos salientables nas administracións públicas en calquera ámbito territorial.

Estes membros honorarios do Concello poderán prestar servizos de xeito altruísta e desinteresado ao Concello de Cervantes nos seus respectivos campos profesionais, e especialmente asesorar á Alcaldía naqueles asuntos que lles sexan consultados e postos de manifesto.

Artigo 6º

Institúese a distinción **“medalla de ouro do Concello de Cervantes”**, coa finalidade de premiar a aquelas persoas ou entidades que -polos seus propios méritos- acadasen un prestixio social excepcional no eido no que desenvolven as súas actividades, e que polo especial vencellamento co Concello de Cervantes contribúan a mellorar a súa imaxe e a divulgar o seu coñecemento.

Artigo 7º.

1.-A concesión de calquera das honras a que se refire este regulamento requirirá a instrucción previa do oportuno expediente, que sirva para determinar os méritos, cualidades e ou circunstancias singulares que concorran nos galardoados, e que serán aplicados co maior rigor.

2.-A iniciación do procedemento farase por decreto do alcalde, ben por propia iniciativa ou a instancia da terceira parte dos membros que integran a corporación ou respondendo á petición razoada dun organismo oficial ou de entidade ou asociación de recoñecida solvencia.

3.-No decreto do alcalde designarase de entre os concelleiros un instructor, que se ocupará da tramitación do expediente, asistido do secretario da Corporación ou funcionario no que este delegue

4.-O instructor practicará cantas dilixencias estime necesarias para investigar os méritos, solicitando informe e recibindo declaración de cantas persoas ou representantes de entidades podan subministrar datos, antecedentes ou referencias que conduzan ao esclarecemento de aqueles.



5.–Acabada a práctica de cantas dilixencias fosen acordadas, o instructor formulará proposta motivada, que remitirá ó alcalde.

6.–O alcalde, á vista do actuado no expediente, poderá acordar a ampliación de dilixencias ou aceptar plenamente a proposta e sometela á consideración do Pleno da Corporación, requeríndose para a súa concesión o voto favorable da maioría absoluta legal dos membros da Corporación.

A votación será secreta e mediante a utilización de papeletas nas que se consigne soamente as palabras “a favor”, “en contra” ou “abstención”, segundo a vontade de cada membro da corporación local.

Artigo 8º

O recoñecemento de “fillo predilecto ou adoptivo do Concello de Cervantes” será efectuado nun acto público convocado para tal efecto, e celebrarase no lugar que se estime idóneo, para os efectos de permitir a asistencia dos cidadáns e coa debida cerimonia que require dito acto.

O recoñecemento de “membro honorario” ou o outorgamento da “medalla de ouro”, efectuarase en acto solmeme, que se celebrará no Salón de Sesións da Casa do Concello ao que asistirá a Corporación en Pleno.

Artigo 9º.

O nomeamento de “fillo predilecto” e de “fillo adoptivo” estenderanse nun pergameo no que constarán o título da distinción, o nome e os apelidos do designado, as razóns en que se basea a súa concesión e a data de recoñecemento pola corporación, debendo ir asinado polo alcalde e polo secretario da corporación.

Artigo 10º.

A designación de “membro honorario do Concello de Cervantes” será acreditada por medio da expedición dunha certificación estendida polo secretario da corporación, co visto e praxe do señor alcalde, comprensiva do acordo plenario de dito recoñecemento.

Artigo 11º.

A medalla de ouro levará polo anverso o escudo oficial do Concello de Cervantes, e pola reverso o título, nome e apelidos do premiado e a data de concesión da distinción. O seu custo será sufragado polo Concello.

Artigo 12.

Os fillos predilectos, os fillos adoptivos, os membros honorarios do Concello e as persoas galardoadas coa Medalla de Ouro, gozarán de representación persoal por dereito propio, e nos actos oficiais e nas solemnidades que o Concello celebre, -aos que serán expresamente invitados-, colocaranse nun lugar inmediato ao da Corporación Municipal.



Artigo 13.

Ningunha Corporación poderá outorgar, durante o período do seu mandato, mais dun galardón nas categorías de fillo predilecto e de fillo adoptivo, nin mais de outro nas categorías de membros honorarios do Concello e de beneficiario da medalla de ouro do concello.

Artigo 14.

Pola Secretaría do Concello levarase un rexistro de condecoracións e distincións honoríficas outorgadas pola Corporación, o cal se nomeará Libro de Ouro do Municipio, e comporase de catro seccións numeradas, cuxos títulos serán os correspondentes as distincións que se determinan no Regulamento.

Artigo 15

A condición de fillo predilecto ou adoptivo de Cervantes pode ser revocado cando a conducta pública do titular sexa manifestamente contraria ao Concello de Cervantes, aos principios proclamados na Constitución Española e no Estatuto de Autonomía para Galicia, ou atente gravemente á dignidade dos seus intereses básicos.

A revocación dos títulos requerirá a incoación dun expediente, coa mesma tramitación que para a súa concesión.

Disposición adicional.

As honras e distincións previstas neste regulamento poderán ser concedidas a persoas falecidas. Nese caso, a entrega efectuarase ao familiar máis cercano do agasallado, a xuízo da Alcaldía.

Disposición derradeira.

Unha vez aprobado definitivamente polo Pleno, este regulamento publicarase integramente no Boletín Oficial da Provincia; entrando en vigor unha vez transcurra o prazo de quince días hábiles a que se refire o artigo 70 nº 2 en relación co artigo 65 nº 2 da Lei 7/1985 de 2 de abril, Reguladora das Bases do Réxime Local; comenzando a aplicarse a partir do día seguinte, e permanecendo en vigor ata a súa modificación ou derogación expresa.

Contra este acordo, que pon fin á vía administrativa, poderase interpoñer recurso contencioso-administrativo, ante a Sala do Tribunal Superior de Xustiza de Galicia, de conformidade co disposto na Lei 29/1998, de 13 de xullo, Reguladora da Xurisdición Contencioso-Administrativo, no prazo de 2 meses, contados dende a data de publicación, sen prexuízo do exercicio de calquera outro recurso que estime oportuno.

En Cervantes a 17 de decembro de 2012